

**Sultan Ibrahim terima laporan, taklimat isu Pulau Batu Puteh**  
**Astro Awani**  
**15 Mei 2022**  
**Umavathi Ramayah**

KUALA LUMPUR: Sultan Johor, Sultan Ibrahim Iskandar berkenaan menerima laporan Pasukan Petugas Khas (PPK) berhubung semakan semula undang-undang berkenaan kes kedaulatan Batu Puteh, Batuan Tengah dan Tubir Selatan.

Memetik perkongsian dalam hantaran di akaun media sosial di Instagram Sultan Ibrahim Sultan Iskandar, laporan dan taklimat itu dipersembahkan oleh Menteri di Jabatan Perdana Menteri (Parlimen dan Undang-Undang), Datuk Seri Wan Junaidi Tuanku Jaafar bersama-sama Pengerusi Pasukan Petugas Khas, Tan Sri Mohamed Apandi Ali.

Laporan dan dan taklimat itu berlangsung di Istana Polo pada Ahad yang turut dihadiri Tunku Mahkota Johor, Tunku Ismail Sultan Ibrahim serta Menteri Besar Johor, Datuk Onn Hafiz Ghazi.

Menerusi pertemuan tersebut, Sultan Ibrahim sekali lagi menegaskan kepada PPK bahawa sebab-sebab keputusan kerajaan bekas Perdana Menteri, Tun Dr Mahathir Mohamed untuk tidak meneruskan semakan semula kes itu di Mahkamah Keadilan Antarabangsa (ICJ) perlu dijadikan pengetahuan umum.

“Ini adalah soal kedaulatan negeri Johor. Rakyat Johor berhak untuk mengetahui mengapa Kerajaan Pakatan Harapan (PH) mengambil keputusan sedemikian,” titah baginda.

Pada 29 Oktober lalu, Kabinet bersetuju untuk membentuk PPK berkenaan ekoran keputusan kerajaan Persekutuan ketika pentadbiran Dr Mahathir pada tahun 2018 untuk tidak meneruskan permohonan semakan semula kes Pulau Batu Puteh di ICJ.

Sultan Ibrahim dilaporkan bertitah bahawa keputusan sedemikian seolah-olah mengaku kalah sebelum memasuki gelanggang di mahkamah berkenaan, walaupun ada pertemuan bukti baharu yang memihak kepada Malaysia.

“Kenapa keputusan untuk tidak meneruskan permohonan itu diambil? Mengapa soal kedaulatan Johor seolah-olah tidak penting kepada kerajaan pada waktu itu?” soal bginda dalam satu kenyataan pada tahun lalu.

**© 2022 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-malaysia/sultan-ibrahim-terima-laporan-taklimat-isu-pulau-batu-puteh-361487>